


LETTRE DV ROY
AVX GOUVERNEURS
DE SES PROVINCES.



A PARIS,

Par FED. MOREL, & P. METTAYER,
Imprimeurs ordinaires du Roy.

M. D C. XVII.

Avec Privilege de sa Majesté.

Case


F

39

.326

1617L

THE NEWBERRY
LIBRARY



LETTRE DV ROY
AUX GOUVERNEURS
des Prouinces.



MON COUSIN,

Je ne doute point
que dans le cours
des affaires qui se
sont passees depuis la mort du
feu Roy Monseigneur & Pere
(que Dieu absolve) Vous n'ayez
facilement remarqué comme le
Mareschal d'Ancre & sa femme,
abusans de mon bas aage, & du
pouuoir qu'ils se sont acquis de
longue main sur l'esprit de la

A ij

Royne madame ma Mere, ont
proietté d'vsurper toute l'au-
thorité, dilposer absolument des
affaires de mon Estat, & m'oster
le moyen d'en prendre cognois-
sance: dessein qu'ils ont poussé
si auant, qu'il ne m'est iusques
icy resté que le seul nom de Roy,
& que c'eust esté vn crime capi-
tal à mes Officiers & subiects
de me veoir en particulier, &
m'entretenir de quelque dis-
cours serieux. Ce que Dieu par
sa toute bonté m'ayant faiét ap-
percevoir & toucher au doigt le
peril eminent que ma personne
& mon Estat encouroient dans
vne si desreglee ambition, si
i'eusse donné quelque tesmoi-
gnage de mon ressentiment, &

du desir extreme que i'auois d'y
apporter l'ordre requis , i'ay
esté contrainct de dissimuler &
couvrir par toutes mes actions
exterieures, ce que i'auois de bon
en l'interieur, en attendant qu'il
pleust à ceste mesme bonté me
preparer la voye & l'opportuni-
té d'y remedier. Sur ce il est ar-
riué que depuis quelques iours
plusieurs personnes de qualité,
tant de ma bonne ville de Paris
que de diuers autres endroits de
mon Royaume , prenans occa-
sion de l'absence dudit Maref-
chal qui s'en estoit allé en Nor-
mandie, en deliberation d'y faire
du seiour, se seroient adressez
à la Royne madite Dame &
Mere, & aux ministres (que ledit

Mareschal & sa femme auoient
establis pour souz eux & à leur
volonté manier seuls les affaires
de cet Estat) & leur auroient
vivement représenté qu'il estoit
extremement necessaire de me
faire agir promptement & à bon
escient en l'administration de
mes affaires, autrement que mon
Royaume qui se souleuoit de
toutes parts par ce manquemēt,
estoit sur le point d'vne entiere
subuersion: dequoy ledit Mares-
chal d'Ancre ayant esté aussi tost
aduerty, il seroit reuenu en gran-
de diligence , & d'abord auroit
par son pouuoir & par ses arti-
fices, non seulement voulu faire
estouffer ces salutaires ouuertu-
res & propositions, comme con-

traies à son dessein : Mais encores auroit resolu de me priuer des moyens de les effectuer, par des conseils que i'ayme mieux taire que publier. Ce qu'estant plainement venu à ma cognoissance, Et considerant qu'outre le peril de ma personne, la haine publique que l'on portoit au gouuernement de ces gens là, auoit tellement aigry & alteré les esprits dans mon Royaume, qu'il couroit fortune d'un embrasement vniuersel si je différois d'auantage à y pourvoir. Poussé de ces iustes considerations, & du Conseil que Dieu m'a inspiré en ceste occasion : Je me suis ce iourd'huy resolu de m'asseurer de la personne dudit

Mareschal d'Ancre, Ayant commandé au Sieur de Vitry Capitaine de mes gardes de l'arrester prisonnier dans mon Chasteau du Louure. Ce que voulant executer, ledit Mareschal d'Ancre qui estoit extremement accompagné à son accoustumee, ayant voulu faire de la resistance avec ceux de sa suite, il se seroit tiré quelques coups, d'aucuns desquels il auroit esté porté mort par terre. En suite j'ay fait arrester sa femme, ensemble aucuns des susdits ministres, & supplié la Royne madite Dame & Mere, de trouuer bon que ie prenne desormais en main le Gouuernail de mon Estat,

à fin

à fin d'essayer à le releuer de l'extrémité où les mauuais conseils dōt elle s'est seruie, l'ōt precipité. A quoy i'espere que Dieu me fera d'autant plus volontiers la grace de paruenir, que mes intentions ne buttent qu'à la gloire, & au bien de tous mes subiects: Dont ie vous ay bien voulu donner aduis comme à l'vn de ceux de qui ie faiçts vn plus particulier estat: Vous priant de faire entendre ceste action par tout où vostre charge s'estend, & adiouster aux raisons dessusdictes, celles que vostre prudence vous fera iuger propres pour contenir vn chacun dans les bornes du deuoir & de l'obeissance: Vous

B


employant soigneusement à ce qu'il n'y ait aucune esmotion dās vostre Gouuernement, & que rien n'y trouble le repos que ie desire y estre conserué. Que si quelques vns ont des plainctes ou demandes à faire, vous leur pourrez dōner assurance qu'en s'adressant à moy par les voyes que les bons subiects doiuent tenir en ce qu'ils ont à desirer de leur Roy, ils me trouueront porté à tout ce qui sera de la raison & de la Iustice. Ceste action a esté tellement louée de deça, que l'on n'entend qu'applaudissemēs & benedictions sur moy, pour l'auoir entrepris en vn temps si opportun & si necessaire: l'espe-


re qu'il en sera de mesme partout
 ailleurs. Cependant i'ay escrit à
 mes Lieutenans Generaux en
 mesarmees de les tenir tousiours
 en eltat, afin de m'en seruir con-
 tre ceux qui ne voudront reco-
 gnoistre mon auctorité. Au pre-
 mier iour ie vous feray vn autre
 despeche, & vous ordonneray ce
 que vous aurez à faire pour mon
 seruice. Cependant vous pren-
 drez assurance que si vous me
 rendez des preuues correspon-
 dantes à l'estime que ie faiets de
 vostre affection enuers moy;
 Aussi ne manqueray-je pas de
 bonne volôté pour le recognoi-
 stre. Je prie Dieu mon Cousin
 qu'il vous ayt en sa saincte garde.


Escrit à Paris le vingtquatries-
me iour d'Auril, mil six cents
dix-sept.


Signé, LOVYS.

Et plus bas, DE LOMENIE.









I. 506.

